

Ruthy Vrieswijk



**Un Artista "Poeta" cu ta carga un corason
yen di paz y amor pa comparti**

Ken ta Ruthy?

Wel, mi ta un ama di cas; un amiga me-
ricano a cambia mi titulo pa "Domestic
Engineer" e ta sona mas sofisticada, pero
ami ta un persona cu no ta gusta cushina.

Mi ta felismente casa cu Johan Vrieswijk
y mi tin dos yiu homber Regnier y Jean
Louis y un nieto Kevin, nan ta na Hulanda.
E bida matrimonial ta un tiki complica
tin biaha, pero nos ta traha keto bai riba
dje, cu hopi pasenshi, amor y cariño y nos

no ta keda rabia pa cos chikito. Mi casa ta
yudami y apoyami cu tur mi proyectonan.
Nos ta biba den hopi armonia y amor.

Mi ta un persona hopi facil, simpel, activo,
alegre y ta gusta combersa. Mi a traha na
diferente caminda; presentadora di noticia,
cu banco, hotelnan. Mi a biaha hopi cu mi
casa. Mi ta aprecia arte, musica y pintura
masha hopi.

For di mi 16 aña mi a cuminsa skirbi poe-
ma y mi por hacie den cuatro idioma. Mi
ta skirbi poesia pa hopi hende y mi no ta
cobra. E personanan ta dunami e informa-
cion y mi ta usé pa traha e poesia, por ta pa
hacimiento di aña, bruid, morto etc.

Mi ta miembro di Womens Club pa mas
cu 15 aña y lider activo den grupo di Scou-
ting Aruba pa mas di 25 aña

Actualmente mi tin mi propio programa
na radio "Dushi Awasero Musical" na radio
Kelkboom Esaki ta un programa cu ta de-
dica na e artistanan local pa promociona su
musica, su pintura, su arte, personanan cu
ta skirbi buki y topiconan cu ta toca mi cu-

razon. Den mi programa mi ta gusta pone
musica gospel, y oldies den tur idioma, y
mi ta recita poemanan den cuatro idioma,
papiamento, ingles, hulandes y spaño.

Mi a yega di graba 5 C.D. di mi poemanan
y tambe den luna di Mei 2006 mi tabata
tin mi prome solo exposicion di pintura na
Instituto di Cultura "Soul stirring mood
swings".

Mi no ta considera mi mes un hende hopi
religioso, pero mi ta kere den un Dios su-
premo cu a dunami tur e sabiduria y talen-
tonan cu mi a desaroya durante mi bida y
cu mi por a comparti cu hopi hende.

Actualmente mi ta na "estado" di tres
proyecto hopi importante y cu mi kier pa
nan bin cla pa otro aña, na unda mi ta bai
haci 50 aña di bida y 30 aña di feliz bida
matrimonial.

Un les cu mi a siña den bida, no paga malo
cu malo, pidi Dios ilumina bo caminda,
nos tur ta igual. Y mi ta pidi papa Dios
dunami hopi bida y salud pa mi por sigui
skirbi mi poemanan cu hopi positivismo,
amor y alegria.

